

احلم بحضن تحس فيه طعم الحنان
احلم بحضن تلاقى فيه بر الأمان
احلم بابن يكون مطيع وتلاقى نفسك فيه
احلم بابن يكون جدع يقدر يشيل اسمك
احلم بأخ يكون سند دائما قريب منك
أحلم بأخ يكون وتد يقدر يشيل عنك
أحلم وحقق كل أحلامك هناك
دي العيشة سهلة
ومش هتحتاج شيء معاك

بحر الخيال

جينا الحياة سرقة جينا الحياة بدموع
حتى بدون أوجاع دموعنا كات سابقة
جينا الحياة سرقة
طب ليه بكينا زمان واحنا جداد فيها
لا كنا حبيننا ولا كنا جرينا ولا كنا دقنا مرار
ولا جرح أحبيننا
طب ليه دموع سابقة كان ده كفيل لينا
إن إحنا هنعاني واحنا اللي مفهمناش
وكبرنا والأحزان مشيت مع الأيام
رضيت ترافقنا وتكون لينا صاحب
دخلت ف تفاصيلنا بانت على وشوشنا
صحيح صغار ف السن
لكن وجعنا عجوز وساب أثر فينا
كنا في يوم عايشين
ماشيين ومش عارفين إن إحنا مش واصلين

مهما الخطاوي تعد طول ما الطريق بيمد
عايشين وبنهرج وناسيين وقت الجد
والعمر كان بيمر أحلامنا كات سبقاه
ورضينا نتألم ومفيش كلام غير آه
أيامنا زمان بتفوت أحلامنا أهي بتموت
نصرخ ومن غير صوت والجرح ماله دوا
أحلامنا كات مطرة
وسحابة بتداري عن بيتنا ضي الشمس
بتغرق الشارع ألحان ومزيكا
وعشان زما أصم مسمعش ناي ولا عود
ومفيش أمل موجود غيرانه نعيش ف الهم
الهم ذكريات مع حب فات والكلام شبه السكات
والصداع اللي مرافقني والجوى لمهدئات
واللي جنبني مش حاسسني قلبي عايش والامات
الهم طفل نايم ع الرصيف.. فقر مش لاقى الرغبة
قوي ييجي ع الضعيف والزمن واقف يشاهد
كلاكيت وبيعيد المشاهد والضمير جوانا مات
الزمن حبة مشاهد واحنا كومبرسات ف فيلم
السيناريو مش عاجبني.. مش مهم
مش هتفرق ف النهاية
ف النهاية البطل هيفوز بحبه
وانت أيه غير شخص بيكمل حكاية
السنين أيام بتجري خيفة من ضغط الحياة
والسعادة بدون إعادة والأمل طوق النجاة
حتى أحلامنا البسيطة واقفة للمال انتباه
صعب تحقيق أي حاجة
غير بسلطان أو بجاه